

**S A M Þ Y K K T**

um breytingu á lögreglusamþykkt fyrir Ólafsfjarðarkaupstað,  
nr. 178 15. september 1965.

## 1. gr.

55. gr. orðist svo:

Veitingahúsum, kaffihúsum, dansstöðum, knattborðsstöðum og öðrum slíkum skemmtistöðum skal lokað kl. 24.00 til 7.00. Knattborðstofum og öðrum slíkum skemmtistöðum skal auk þess lokað allar stórhátíðir, og aðra helgidaga frá kl. 12.00—16.00.

## 2. gr.

Samþykkt þessi öðlast þegar gildi.

Samþykkt þessi, sem bæjarstjórn Ólafsfjarðar hefur samið og samþykkt samkvæmt lögum nr. 1 3. janúar 1890, sbr. lög nr. 67 28. nóvember 1919 um lögreglusamþykktir fyrir kaupstaðina, staðfestist hér með og birtist til eftirbreytni öllum þeim, sem hlut eiga að máli.

*Dóms- og kirkjumálaráðuneytið, 12. maí 1980.*

Friðjón Þórðarson.

Ólafur W. Stefánsson.

**L E I Þ B E I N I N G A R**

um utankjörfundaratkvæðagreiðslu á sjúkrahúsum  
og dvalarheimilum aldraðra.

Samkvæmt 63. gr. laga um kosningar til Alþingis, nr. 52 14. ágúst 1959, sbr. lög nr. 15 5. apríl 1974, er kjörstjóra við atkvæðagreiðslu utan kjörfundar hérlendis heimilt að láta kosningu fara fram á sjúkrahúsi eða dvalarheimili aldraðra, enda sé kjósandi sjúklingur eða vistmaður á stofnuninni. Atkvæðagreiðsla í stofnunum þessum skal fara fram á þeim tíma, sem kjörstjóri ákveður, að höfðu samráði við stjórn viðkomandi stofnunar, samkvæmt nánari reglum, sem dómsmálaráðuneytið setur.

Um það, hverjar stofnanir teljast sjúkrahús og dvalarheimili aldraðra, vísast til IV. kafla laga um heilbrigðisþjónustu, nr. 57 20. maí 1978, og laga um dvalarheimili aldraðra, nr. 28 18. apríl 1973, en samkvæmt lögum þessum þarf leyfi heilbrigðisráðherra til að setja á stofn og reka sjúkrahús og dvalarheimili aldraðra.

Kjörstjórar við atkvæðagreiðslu á sjúkrahúsum og dvalarheimilum aldraðra eru þeir sömu og annast utankjörfundaratkvæðagreiðslu almennt, sbr. a- og b-lið 13. gr. laga um kosningar til Alþingis.

Rétt til að greiða atkvæði utan kjörfundar á sjúkrahúsi eða dvalarheimili aldraðra hafa eingöngu sjúklingar eða vistmenn á viðkomandi stofnun. Aðrir, svo sem starfsfólk stofnana þessara, hafa hins vegar ekki rétt til að greiða þar atkvæði. Um kosningu þessa eiga að öðru leyti við ákvæði 62. gr. laga um kosningar til Alþingis. Samkvæmt 2. mgr. 62. gr. hafa þeir heimild til að greiða atkvæði utan kjörfundar, sem samkvæmt læknavottorði er ráðgert að dveljast muni í sjúkrahúsi á kjördegi, einnig barnshafandi konur, sem ætla má að muni verða hindraðar í að sækja kjörfund á kjördegi. Kjósandi, sem ekki ráðgerir að dvelja á sjúkrahúsi eða dvalar-

heimili aldraðra á kjördegi, á því aðeins rétt á að greiða atkvæði utan kjörfundar, að hann geri ráð fyrir að vera fjarverandi frá þeim stað, sem hann á kosningarétt, þá er kosning fer fram, og að hann af þeim ástæðum geti eigi sótt kjörfund, sbr. 1. mgr. 62. gr. Þegar um er að ræða sjúklinga, og einkum vistmenn á dvalarheimilum aldraðra, sem hafa fulla ferlivist, er rétt að taka fram, að þeir mundu að jafnaði ekki verða taldir eiga rétt á að greiða atkvæði utan kjörfundar, enda mundu þeir eiga kost á að greiða atkvæði með venjulegum hætti.

Kjörstjóri ákveður, í samráði við stjórn viðkomandi stofnunar, og að fengnum upplýsingum um sjúklinga og vistmenn á stofnuninni, hvort ástæða sé til að láta atkvæðagreiðslu fara þar fram, og þá hvenær. Skal ákvörðun um þetta efni tekin eigi síðar en sjö dögum fyrir kjördag, og skal þá birta auglýsingu innan viðkomandi stofnunar um það, hvar atkvæðagreiðslan fer fram og á hvaða tíma. Að jafnaði mundi nægilegt, að atkvæðagreiðsla utan kjörfundar fari fram einn dag í hverri stofnun, í nokkrar klukkustundir, eftir fjölda þeirra sjúklinga og vistmanna, sem rétt mundu eiga á að greiða atkvæði utan kjörfundar á stofnuninni.

Um kosningaathöfnina sjálfa, þ. á m. um heimild til að veita kjósanda aðstoð, gilda að öllu leyti sömu reglur og um utankjörfundaratkvæðagreiðslu almennt, sbr. 66. gr. laga um kosningar til Alþingis, sbr. lög nr. 37 29. maí 1979. Nauðsynlegt er, að viðkomandi stofnun láti í té aðstöðu, þ. á m. hentugt húsnæði, svo og eftir atvikum aðstoðarfólk, til þess að atkvæðagreiðsla geti farið fram með fyrirskipuðum hætti. Rétt er að undirstrika, að kjósanda ber að koma á fund kjörstjóra, þar sem atkvæðagreiðslan fer fram, og að atkvæðagreiðsla má eigi fara fram í sjúkrastofum eða herbergjum vistmanna.

Leiðbeiningar þessar taka gildi 1. júní 1980.

*Dóms- og kirkjumálaráðuneytið, 12. maí 1980.*

F. h. r.

**Baldur Möller.**

*Ólafur W. Stefánsson.*

## REGLUGERÐ

### um gjaldmiðilsbreytingu.

#### 1. gr.

Í reglugerð þessari nefnist gjaldmiðill sá, sem út hafði verið gefinn fyrir 1. janúar 1981, gamlar krónur (gkr.), en gjaldmiðill sá, sem út verður gefinn 1. janúar 1981 og síðar, nefnist nýjar krónur (nýkr.).

#### 2. gr.

Ein gömul króna skal jafngilda einum eyri nýrrar krónu og eitt hundrað gamlar krónur einni nýrri krónu. Skal þannig hver peningur (mynt og seðlar) nýrrar krónu vera hundraðfaldur að verðgildi miðað við gamla krónu, þótt ákvæðisverð sé hið sama. Sú breyting, sem um er að ræða, nefnist verðgildisbreyting í reglugerð þessari. Jafnframt fara fram gjaldmiðilsskipti, og er aðgerðin í heild kölluð gjaldmiðilsbreyting.

#### 3. gr.

Sérhver banki og sparisjóður skal hinn fyrsta afgreiðsludag eftir 1. janúar 1981 og síðan fram til júniloka sama ár skipta gömlum krónum í nýjar krónur.